

**Copij van den brief van Z. Exc. aan de vier oude kolonellen.**

Erentfeste, eersame, wyse, discrete, besunder goede vrinden, wy hebben sunderlinghe bedroeft gheweest te verstaen tgene opten 19den deser maendt in den Breen Raedt u luyder stadt is ghehandelt aengaende de veranderinghe ende verlatinghe van u luyder ampt, niet vuyt oorsaecken dat wy achten (zoo wy oock meynen u luyden geheelyck bekent te wesen) dat de bedieninghe der officien, diensten ende ampten niet en behoort onder de ghemeynte verdeilt te wordene, tot ontlastinghe van den ghenen die te vorens tot den selven diensten hen heb-

ben begeven, maer dat wy niet en connen loven oft voor goet innesien de maniere die in de vs. veranderinghe geschiet is ende souden sonderlinghe begheert hebben dat volghende ons versoeck, zoo met onsen brieven aen dien vande vs. stadt, als oock aen eenighe haere gedeputeerde gedaen, daeselve veranderinghe tot onse wedercomste vertoghen oft ten minsten een anderen wech ende wyse daerinne hadde ghebruyct gheweest, dan soo wy oock syn onderricht dat ghy luyden met alle danckbaerheyt ende bekentenissen van u luyder goeden ende getrouwen dienst by den leden der vs. stadt syt van den selven verlaten met vereeringhe ende sulcken bescheet dwelck voor u luyden ende uwe naecomelingen sal moghen dienen tot betuygenisse van het groot debvoir ende getrouwicheyt by u lieden der stadt ende dienvolghens der ghemeyne zaecke in dien deele bewesen ende dat wy niet gherne (naer dien sulckx is geschiet) oorsake en souden geven om deene veranderinghe op dander te trecken ende van deen inconvenient in dander te vallen, zoo hebben wy tselve wel willen ten besten innesien ende de nieuwe ghecorne colonellen voor zulckx approberen volghende onse brieven aen de vs. leden ten selven eynde ghesonden, u luyden midts desen int particulier hoochelyck bedanckende voor u luyden goedt debvoir ende ghetrouwen dienst, hier inne tot noch toe bewesen, waervan wy zyn ende altyt selen wesen een zekere gewis ende volcomen ghetuyghenisse (soo ons deselve voor alle andere syn bekend) u lieden midts desen tot voorder ende meerder bekentenisse van dien wel willende beloven dat wy tot onser eerster comste des aengaende selen geven voorder ende breeder bescheet by geschrifte ende anderssins in sulcker vueghen ende vorme zoo wy ende ghy luyden sult moghen versinnen tzelve alderbeste soude mueghen gheschieden, begheerende dat ghy lieden middeler tyt voor ghewisch wilt ghelooven dat wy sullen altyt bereedt wesen om deselve te bewysen alle vrintschap ende gheneghentheyte daer ende alomme ons tselve sal mogelyck wesen, wy betrouwen u luyden voorts dat ghy sult den nieuw aencomen-

de colonellen doen alle hulpe, bystandt ende beweghinghe in alle voorvallende saecken die haer in denselven hueren ampt zelen voorwenden d'welck wy oock andersins midts desen hertelyck syn versueckende. Hiermede dese eyndende ende bidden den Almoghenden u lieden, erntfestighe, eersame, wyse, besunder goede vrinden, te nemen in syne heylighe hoede. Vuyt Amsterdam den 28sten martii 1581. U lieder zeer goede vrindt tot uwen dienste. Guille de Nassau.